



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

6. Kalenderwoche – ab 7. Februar 2010

Was dun die wolln?

Es heeßd ja manschma bei beschdimmde Leide, dass de Reschde nisch wissn däde, was de Linke dun dud. In dor Bolledig isses beschdimmd immor so. Was de Linke machd, das kenn de Reschdn nisch wissn. Un umgekährd isses ooch so. Wobei nu grade in ledzdor Zeid da had mor gahr nisch mähr viel geheerd ibor de Reschdn un so. Abor desdo mähr ibor de Linkn.

Das heeßd nu widdor - mor had dauornd was geheerd ibor de Linkn... - dasse sisch schdreidn dun, dasse dähn Bardsch weggedrängeld hamm, weil dähr was geeschn dähn Osgahr Lafondähne gesachd had... dass de Sahra Waachngneschd villeischd doch was mid dem Osgahr gehabbd had... un dähr is dann an dor Brosdada erkrankd... un de Osdlinkn wolln annersch wie de Wesdlinkn... un nu - da heerd sisch schließlisch alles off! - dor Osgahr dud nisch mähr midmachn! Beng!

Dor Osgahr had gesachd, dass das mid seinor Brosdada e Warnschuss gewähns is. Dassor e bißl ruischer lähm muss, wennor noch e baar Jährschn zuguggn will, was aus dor Linkn wern dud.

Ja, fasd jedn Daach had ibor de Linkn sowas un sowas Ähnliches in dor Zeidung geschdandn. Wasse machn un in Zugunfd wolln dun... dadervon had allordings nisch sähr viel drinne geschdandn. Un wenn Se misch frachn... - mir is das schdellnweise ooch ziehmlich schleiorhafd. Was dun die denne eischendlisch wolln? Keen Brosdadakräbs - guhd, un se wolln irschendwie midmischn... un se wolln sisch ooch fiehrs wergdädsiche Volk eingesedzn... fiehr de Gereschdischkeed un so... un geeschn de Arbeitslosischkeed... un fiehr Frieden in dor Weld... - abor das dun doch alle wolln!

Guhd, bei de Linkn wird ooch Afghanistan mid zur Weld dazugereschnd. Also, zu dähr Weld, wo

Frieden sein soll. Abor es dud ooch Weld gähm, wo de Linkn irschendwie ooch lieber nisch rischdisch hinguggn wolln. Mor missde eischendlich werglich ma heern, was de Linkn selbor zu sisch so denkn un sachn dun. Nee, das was mor dauornd in dor Zeidung läsn dud, da kammor sisch einfach kee rischdisches Bild machn. Isch meene, ibor das, was die wolln!

Un das is abor nu ooch widdor bei alle annorn genauso! Was dun die alle wolln?

Ogeh, da duds beschdimmd in alle Bardein so Schdadudn gähm... odor ooch wennse Bardeidaach ham... da kennedesde villeischd was Genaueres erfahrn ibor das, wasse alle wolln... also, jedor fiehr sisch!... - abor ehm sonsd isses schwähr. Ooch was de Reschdn bedreffn dud. Un mor kann ja nisch immor so bleede denkn, wie die das womeeschlich machn dun. Also, nisch bloß de Reschdn - alle!

Zum Beischbiel ooch - woriebor sisch nu dor Wesdorwelle un de Angela so in de Haare ham? Odor hamm die sisch gahr nisch in de Haare? Bloß in dor Wolle? Odor gahr nisch? Dud das bloß so in dor Zeidung schdehn? Had da widdor so e Schurnalisd sisch was aus de Fingor gezudschd? Nee, isch weeiß ooch nisch... - mor grischd einfach nisch rischdisch raus, was de Reschde un de Linke un ooch die, die dazwischn häng dun... was die eischendlich so machn! Is das werglich Bolledig?

Eduard Sachsenmeyer